

Adrodd i'r	Pwyllgor Craffu Partneriaethau
Dyddiad y cyfarfod	13 Chwefror 2025
Swyddog / Aelod Arweiniol	Aelod Arweiniol yr Amgylchedd a Chludiant / Pennaeth Cynllunio, Gwarchod y Cyhoedd a Gwasanaethau Cefn Gwlad
Awdur yr Adroddiad	Rheolwr Traffig a Chludiant
Teitl	Cynllun Cludiant Rhanbarthol Drafft

1. Am beth mae'r adroddiad yn sôn?

- 1.1. Mae'r adroddiad hwn yn sôn am ddatblygiad parhaus Cynllun Cludiant Rhanbarthol Gogledd Cymru, fydd yn disodli *Cyd Gynllun Cludiant Lleol Gogledd Cymru 2015*.

2. Beth yw'r rheswm dros lunio'r adroddiad hwn?

- 2.1. I roi trosolwg i'r Pwyllgor Craffu Partneriaethau o'r Cynllun Cludiant Rhanbarthol Drafft yr ymgynghorir arno ar hyn o bryd am 12 wythnos. Dechreuodd y cyfnod ymgynghori ar 20 Ionawr 2025.

3. Beth yw'r Argymhellion?

- 3.1. Bod y Pwyllgor yn cadarnhau ei fod wedi darllen, wedi deall ac wedi ystyried y Gwerthusiad Lles Integredig (Atodiad A) fel rhan o'i ystyriaethau.
- 3.2. Bod y Pwyllgor yn nodi cynnwys yr adroddiad ac yn rhoi sylwadau ar y Cynllun Cludiant Rhanbarthol Drafft.

4. Manylion yr adroddiad

Cefndir

- 4.1. Yng Nghymru, mae gofyn i bob un o'r pedwar Cyd-bwyllgor Corfforedig Iunio Cynllun Datblygu Strategol (CDS) a Chynllun Cludiant Rhanbarthol (CCRh) ar gyfer eu rhanbarth. Mae'r adroddiad hwn yn ymwneud â datblygu *Cynllun Cludiant Rhanbarthol Gogledd Cymru*, sy'n cael ei ddatblygu gan Gyd-bwyllgor Corfforedig Gogledd Cymru ar y cyd â chwe awdurdod lleol Gogledd Cymru.
- 4.2. Bydd *Cynllun Cludiant Rhanbarthol Gogledd Cymru* yn disodli *Cyd Gynllun Cludiant Lleol Gogledd Cymru 2015*. Bydd y Cynllun blaenorol yn parhau'n "fyw" nes bydd Cynllun Cludiant Rhanbarthol Gogledd Cymru wedi cael ei gymeradwyo gan Lywodraeth Cymru. Disgwylir i hynny ddigwydd yn haf 2025.
- 4.3. Diben y pedwar Cynllun Cludiant Rhanbarthol yw helpu i gyflawni'r uchelgeisiau yn Strategaeth Cludiant Cymru, Llwybr Newydd. Mae Cynllun Cyflawni Cludiant Cenedlaethol hefyd, fydd hefyd yn helpu i gyflawni Strategaeth Cludiant Cymru. Llywodraeth Cymru sydd wedi datblygu'r Cynllun Cyflawni Cludiant Cenedlaethol a bydd yn darparu prosiectau cefnffyrdd, prosiectau rheilffyrdd a pholisïau, prosiectau a mentrau cludiant o bwys cenedlaethol.
- 4.4. Mae Strategaeth Cludiant Cymru yn nodi'r weledigaeth ar gyfer system gludiant gynaliadwy, hygyrch, diogel ac effeithlon ar hyd a lled Cymru. Mae'n rhoi pwyslais penodol ar annog newid moddol i ffyrdd mwy gwyrdd o deithio.
- 4.5. Rhaid i bob Cynllun Cludiant Rhanbarthol gynnwys polisïau ar gyfer darparu Strategaeth Cludiant Cymru ar lefel ranbarthol a bydd ganddynt gylch bywyd o 5 mlynedd.
- 4.6. Rhaid i bob Cynllun gynnwys Cynllun Cyflawni hefyd yn nodi sut y bydd yr awdurdodau lleol yn darparu'r polisïau a nodir yn y Cynllun Cludiant Rhanbarthol o ran prosiectau a mentrau. Yn Sir Ddinbych, mae'r prosiectau sy'n cael eu cynnwys yn y Cynllun Cyflawni yn cael eu rhestru yn Atodiad B.

4.7. Mae Cynllun Cyflawni'r Cynllun Cludiant Rhanbarthol yn bwysig oherwydd bydd yn cael effaith ar ba brosiectau sy'n cael arian grant Llywodraeth Cymru yn y blynyddoedd i ddod. Mewn geiriau eraill, os nad yw prosiect yn cael ei gynnwys yng Nghynllun Cyflawni'r Cynllun Cludiant Rhanbarthol, bydd ei siawns o lwyddo yn llawer iawn llai yn erbyn prosiectau eraill sy'n cystadlu am arian grant.

Datblygiad y Cynllun Cludiant Rhanbarthol

4.8. Mae Alwen Williams, Cyfarwyddwr Portffolio yn Uchelgais Gogledd Cymru wedi arwain datblygiad cychwynnol y Cynllun Cludiant Rhanbarthol, wrth i strwythur gweithredol y Cyd-bwyllgor Corfforedig gael ei sefydlu.

4.9. Yn y dyfodol, bydd CBS Conwy yn awdurdod arweiniol ar gyfer datblygu'r Cynllun ymhellach i'r cam cymeradwyo.

4.10. Mae'r ymgynghorwyr, Arup, wedi cael eu comisiynu i helpu i gydlynu'r mewnbwn gan y chwe awdurdod lleol ac i wneud tasgau penodol eraill sy'n gysylltiedig â llunio'r Cynllun Cludiant Rhanbarthol, megis llunio *Adroddiad Cwmpasu Gwerthusiad Lles Integredig*.

4.11. Mae Uwch Swyddogion o'r chwe awdurdod lleol, yn cynnwys Sir Ddinbych, wedi cymryd rhan yn y gwaith o ddatblygu polisiau drafft y Cynllun, a'r Cynllun Cyflawni.

4.12. O ran Sir Ddinbych, mae'r Rheolwr Traffig a Chludiant wedi cydlynu mewnbwn i ddatblygiad y polisiau drafft a phrosiectau gan swyddogion o wasanaethau a thimau gwahanol.

4.13. Mae Aelod Arweiniol yr Amgylchedd a Chludiant wedi bod yn rhan o'r broses o ddatblygu'r Cynllun Cludiant Rhanbarthol drwy Is-bwyllgor Cludiant y Cyd-bwyllgor Corfforedig, sy'n cynnwys arweinwyr portffolio cludiant/priffyrdd chwe awdurdod lleol Gogledd Cymru.

4.14. Gellir gweld y Cynllun Cludiant Rhanbarthol Drafft drwy ddilyn y ddolen gyswllt ganlynol: [Cynllun Cludiant Rhanbarthol Gogledd Cymru](#).

4.15. Mae Atodiad C yn cynnwys Cwestiynau Cyffredin safonol a ddatblygwyd i gydfynd â'r ymgynghoriad ar y Cynllun Drafft.

5. Sut mae'r penderfyniad yn cyfrannu at y Blaenoriaethau Corfforaethol?

5.1. Gweledigaeth Strategaeth Cludiant Cymru yw system gludiant gynaliadwy, diogel, effeithlon a gwyrddach. Bydd yr uchelgeisiau hyn yn cyfrannu at sawl blaenoriaeth yn y Cynllun Corfforaethol yn enwedig; Sir Ddinbych ffyniannus; Sir Ddinbych wyrddach; Sir Ddinbych iachach, hapusach a gofalgar; a Sir Ddinbych sy'n dysgu a thyfu.

6. Faint fydd hyn yn ei gostio a sut fydd yn effeithio ar wasanaethau eraill?

6.1. Bydd y prosiectau a mentrau yng Nghynllun Cyflawni'r Cynllun Cludiant Rhanbarthol yn ddibynnol yn bennaf ar sicrhau arian grant Llywodraeth Cymru. Ar hyn o bryd, mae o leiaf saith grant gwahanol gan Lywodraeth Cymru sy'n ymwneud â phrosiectau cludiant, er eu bod ar gyfer dibenion penodol megis diogelwch y ffyrdd, teithio llesol neu gerbydau allyriadau isel er enghraifft. Mae Llywodraeth Cymru wedi dweud cyn hyn eu bod yn bwriadu cyfuno'r rhain i nifer lai o grantiau mwy yn y dyfodol.

7. Beth yw prif gasgliadau'r Asesiad o'r Effaith ar Les?

7.1. Cynhaliwyd cam cwmpasu'r Asesiad o'r Effaith ar Les fel rhan o'r gwaith o ddatblygu'r Cynllun Cludiant Rhanbarthol.

8. Pa ymgynghoriadau sydd wedi'u cynnal gyda Chraffu ac eraill?

8.1. Cafodd yr ymgynghoriad ar y Cynllun Cludiant Rhanbarthol Drafft ei lansio ar 20 Ionawr 2025 a bydd yn parhau am 12 wythnos. Cynhelir yr ymgysylltu ar-lein yn bennaf, gan fod angen cynnwys rhanbarth Gogledd Cymru gyfan.

8.2. Yn ogystal â'r adroddiad hwn i'r Pwyllgor Craffu Partneriaethau, cyflwynwyd adroddiad i Sesiwn Frifio'r Cabinet ar 3 Chwefror 2025. Cynigir hefyd y dylid

cyhoeddi Nodyn Briffio i'r holl Gynghorwyr Sir ym mis Chwefror 2025 am y Cynllun Drafft.

- 8.3. Hefyd ym mis Chwefror 2025, rydym yn bwriadu ysgrifennu at holl glercod y Cynghorau Dinas, Tref a Chymuned i roi gwybod iddynt am yr ymgynghoriad cyhoeddus a sut y gallant ymateb yn uniongyrchol iddo.
- 8.4. Bydd yr adborth o Sesiwn Friffio'r Cabinet, Craffu a gan y Cynghorwyr Sir yn cael ei ystyried a'i grynhoi i ymateb y Cyngor i'r ymgynghoriad, fydd yn cael ei gyflwyno dan lythyr eglurhaol gan Aelod Arweiniol yr Amgylchedd a Chludiant.
- 8.5. Pan fydd yr adborth o'r ymgysylltiad wedi'i gasglu, bydd yn cael ei ystyried yn ofalus wrth i fersiwn terfynol y Cynllun Cludiant Rhanbarthol gael ei ddatblygu cyn ei gyflwyno i Lywodraeth Cymru yn hwyr yn y gwanwyn 2025.

9. Datganiad y Prif Swyddog Cyllid

- 9.1. Bydd cyflawni prosiectau a mentrau Cyngor Sir Ddinbych sydd yng Nghynllun Cyflawni'r Cynllun Cludiant Rhanbarthol yn ddibynnol yn bennaf ar sicrhau arian grant Llywodraeth Cymru, yn enwedig oherwydd y cyfyngiadau ariannol sy'n wynebu awdurdodau lleol yn y dyfodol. Ar hyn o bryd, bydd angen i bob prosiect sy'n ceisio cyllid allanol (neu fewnol) gyflwyno Achos Busnes Ariannol i Grŵp Craffu Cyfalaf i'w gymeradwyo, cyn cyflwyno unrhyw geisiadau i Lywodraeth Cymru.

10. Pa risgiau sydd ac a oes unrhyw beth y gallwn ei wneud i'w lleihau?

- 10.1. Y risg fwyaf fyddai methu â chynnwys yr holl brosiectau cludiant rydym yn debygol o fod eisiau eu cyflawni yn ystod y 5 mlynedd nesaf yng Nghynllun Cyflawni'r Cynllun Cludiant Rhanbarthol, gan fod angen gwneud hyn i sicrhau arian grant gan Lywodraeth Cymru ar gyfer y prosiectau hynny. I helpu i liniaru'r risg hon, rydym wedi ymgynghori â chydweithwyr i sicrhau bod y prosiectau priodol yn cael eu cynnwys. Bydd yr ymgysylltu sydd ar y gweill hefyd yn rhoi cyfle pellach i roi sylwadau a thrafod y prosiectau sy'n cael eu cynnwys.

11. Pŵer i wneud y penderfyniad

11.1. Mae Adran 21 Deddf Llywodraeth Leol ac Adran 7.4.1 Cyfansoddiad y Cyngor yn amlinellu pwerau'r Pwyllgor Craffu mewn perthynas â datblygu ac adolygu polisi.